

Familia Vitima Rate Laek

Distritu Liquisa, Timor Leste

Petisaun:

Haluha Mak Labele, Justisa mak dalan Los

Sua Exsilensia Sr./a:

1. Prezidenti Parlamentu Nasional RDTL
2. Prezidenti da Komisaun A Parlamentu Nasional
3. Prezidenti da Republika RDTL
4. Primeiru Ministru DRTL
5. Prezidenti Tribunal Supremu RDTL

Exelentismu Señora i Señor deputadu sira no nai ulun sira hotu ,

Ba dala uluk ami hakarak fo hanoin ba Destintus Deputados no Deputadas sira hamutuk ho Nai ulun sira hotu katak, loron 6 April tinan 1999 iha tinan sia (9) liu-ba mosu akontesimentu boot ida iha rejidensia Igreja São João de Brito Liquisa, ne'ebé mak hakanek no hamate vitima barak iha tempu ne'ebà. Asaun ida ne'e halo husi Milisia Pro-Indonesia hamutuk ho Polri no TNI hodi hamosu masakre 6 Abril tinan 1999 iha Liquisa. Masakre ne'e hanesan aktu violasaun direitus umanus hasoru povo sivil ne'ebé mak laiha forsa hodi ba hasubar a'an iha rejidensia Igreja São João de Brito Liquisa. Ema barak sai vitima, feto barak sai faluk tamba lakon sira nia laen ne'ebé mak sira hadomin, no oan barak mos tenke lakon sira nia inan no aman, inan-aman balun mos tenke lakon sira nia oan ho maun alin ne'ebe mak sira hadomi.

Akontesimentu ida ne'e lori terus barak ba vitima no familia vitima sira ne'ebé mak hare rasik asaun brutal husi milisia pro-Indonesdia, Polri no TNI. Masakre ne'e iha ona investigsau husi komisaun barbarak maibe laiha Polri no TNI ida mak responsabilija ba iha maksakre ne'e, to agora vitima sira sei hein nafatin justisa ba kazu ne'e.

Kofi Annan Sekretariu Jeral ONU nian mai vizita to iha fatin masakre iha tinan 2000 no Merry Robinson Komisairu Altu direitus umanus mos mai vizita iha fatin hanesan iha tinan 2003 hodi fo solidaridade ba vitima sira hodi kontinua pasiensia hodi hein prosesu justisa.

Depois de tempu transisaun ba restaurasaun independensia loron 20 de Maio 2002, hein katak kazu hirak ne'e bele prosesa iha tribunal hodi hetan akontabilidade ba ema sira ne'ebé mak involve iha violasaun direitus humanus iha tinan 1999, tanba

kontituisaun rasik garantia iha artigu 160. Iha Indonesia hari tribunal ad-hoc HAM hodi prosesa kazu violasaun direitus umanus mak akontese iha Timor Leste antes no depois de referendun tinan 1999 maibe laiha TNI no Polri boot ida mak responsabiliza, tamba tribunal ne'e halo hanesan teatru ida deit hodi justifika katak sira la-sala. Iha Timor Leste rasik halo dunik prosesu julgamentu liu husi Tribunal Painel Spesial maibe nia mandatu remata tiha ona iha tinan 2004 tuir mandatu ONU nian. Prosesu CAVR nian mos remata tiha ona ho nia mandatu hodi hakerek relatoriu no hasai rekomendasaun ho naran "Chega" iha fulan otubru tinan 2005, maibe to agora Parlamentu Nasional permeira legislasaun no to Parlamentu Nasional segundun legislasaun agora seidak diskuti no debate kona ba relatoriu no rekomendasaun ne'e. Vitima no Familia Vitima sira sei sofre nafatin tamba seidak iha justisa ne'ebé justu tuir konstituisaun.

Karik ita atu haluha tiha deit ou tenke iha justisa mak dalam los, ho rajaun ida ne'e mak ami Vitima no Familia Vitima sira ne'ebé mak komemora tinan sia (9) loron maskare 6 Abril 1999 hodi hato ami nia ejijensia bajei ba konstituisaun artigu 48 hodi ezerse ami nia direitu maka hanesan tuir mai ne'e;

1. Ami ejiji ba Parlamentu Nasional atu rekoñiese loron 6 April tinan 1999 hanesan loron istoriku ba ba Timor Leste espesial ba Distritu Liquisa.
2. Ami ejiji ba Parlamentu Nasional atu debate relatorio CAVR ho nian rekomendasaun "Chega" hodi hasai resolusaun ou lei ruma hodi implementa justisa ba vitima sira.
3. Ami ejiji ba Parlamentu Nasional atu halo lei konaba reparasaun ba vitima no familia vitima tuir saida mak iha rekomendasaun Chega ba reparasaun:
 - Tratamentu saude special ba aleijadus sira ne'ebé sofre iha funu laran
 - Bolsa estudu ba oan kiak sira
 - Ajuda finanseiru ba vitima no familia vitima sira hodi haburas ekonomia no hamenus kiak
4. Ami ejiji ba Governu atu tau orsamentu ba programa reparasaun ba Vitima no Familia Vitima sira ne'ebé mak to ohin loron sei terus no susar hela.
5. Ami ejiji ba stadu atu halao prosesu julgamentu ba autor kriminozu violasaun direitus umanus ne'ebé mak akontese iha tinan 1999, tinan sia (9) liu ba.
6. Ikus liu ami senti lasatisfas ho komisarius CAVR ne'ebé mak laiha responsabilidade ba sira nia lia fuan katak rekonsiliaun hotu tiha sei iha justisa, maibe justisa seidak iha ba vitima sira, komisarius lubuk ida halai ba hotu iha Comisaun Verdadi no Amijade (CVA) hodi halo vitima sira lakon konfiansa tanba laiha responsabilidade moral ba sira nia prinsipiu.

Ami hamulak ba Matebian sira, Rai lulik Timor no ba Maromak hodi haraik tulun ba vitima ho nia familia atu pasiensia hodi hein prosesu justisa ne'ebé kleur maibe tenke iha, tanba ema balun sei laran metan ba vitima no familia sira ne'ebe sei terus hela.

Liquisa, 6 April 2008

Ami mak saran lia,

No	Naran	Nudar	Asinatura
1.	José M. Nunes Serrão	Vitima	José M. Nunes Serrão
2.	Elisa dos Santos	Familia Vitima	Elisa dos Santos
3.	Clara do C. Lopes	Familia Vitima	
4.	Elvira M. Concalves	Familia Vitima	